

671.1238
078
116

卷三十三建置二
城池下 卷三十四建
置志三公署上 卷
三十五建置四公署下

永平府志

永平府志卷三十三

建置志二

城池下

昌黎縣城高三丈厚丈餘周圍四里舊惟土城宏治中
知縣殷圯甃以甃門四上各有樓宏治中知縣陳綱
嘉靖中秦志仁李希洛胡溪楚孔生隆慶中張存智
萬厯閒孟秋吳應選胡科石之峯馮恩洪霖吳望岱
王漢傑楊于陞天啟中尙鑣 國朝順治中程量劉
彥明康熙閒王曰翼陳拜齊皆經修葺同治十三年
知縣楊春華修補城垣三十八丈一尺

池深三丈五尺廣四尺東西門有棧板南北門有寫橋

鼓樓在縣治東北萬厯閒馮恩建楊于陞修 國朝康

熙閒典史王懋修乾隆三十五年知縣林中麟重修

明邑貢生張莊臨重修鼓樓碑記云稽之周禮秋官司寤氏掌夜時以星分夜以詔夜士夜禁此更漏所由昉也樓之名秦以前無所聞而臺則有之天子有靈臺諸侯有觀臺憑高而視以辨四序審氣祲察妖祥也然則樓之制儻亦臺之遺意歟是以魏有麗譙之樓馬遂設爲譙樓譙門皆以嚴守禦警非常也昔常有聞更鼓而知令宰之賢者則鼓之有樓顧不重歟吾邑茲樓創自前朝邑侯代郡馮公恩高可五丈雄峙干城之中其上爲玉皇閣一登眺之則山光入牖海色浸簷宿斗牛於窗櫺挹明河於咫尺四野千村一望百里誠一邑之大觀也嗣是踵而葺者則劍門楊公于陞夏縣秦公士英皆賢令宰也入 清以來厯歲已久彫敗已極兼之兵燹之餘腴壤收於園中豪猾充於旗下賦稅不敷追呼難追莅茲土者方救過之不遑奚暇爲補葺計也以故頽圯者不止斯樓而斯樓則摧於庚子夏霍而隕矣秋七月林公來

宰是邦慨然有興復志但以歲祲欲少需以俟有秋
闕明年方寬征緩訟爲蘇息計乃遽聞外艱奉上命
勉親政如故以俟代者然而老成愈嚴催檄雨集公
悲厥志之未成也親著募疏以爲先倡因勸助得百
餘金於是選材於市鳩工於肆擇吉鼎建入窗以戶
取其堅也易雕欄以堊尙其質也徒困支用不給事
未獲集繼而洪公來任亦欲亟襄厥事但以民逃地
蕪逋賦難完不遑啟處遲之癸卯復與縣幕王君謀
力圖振舉凡綜理之事一切委之迨夏杪而功竣則
依然跂翼矢棘烏革翬飛之勝矣瞻觀於是乎壯更
漏於是乎明闐闐於是乎集奸宄於是乎屏且也晝
角吹殘楊柳月早起者思勤金壺滴斷輾轡聲夜作
者弗息後之司牧者於公餘一登臨焉則風俗之淳
漓可望而知也里巷之盈虛可俯而矚也原野之桑
麻可坐而卜其豐歉也村塢之生聚可立而見其登
耗也况歲時而望風雲分至而占星日吉凶饑穰可
預爲測也由民俗之美惡見政治之得失思補救之
良圖孰非斯樓之神益乎柳子曰賢者之興愚者之
廢廢而復之爲是習而循之爲非若是之不狃因循
可讓而任豈不謂賢哉所惜者時艱邑敝城墉樓堞

不獲次第以理耳雖然繼是而生聚寬養俾用度漸
充庶幾百廢可興未必非是樓爲之嚆矢也林公諱
修字矧堂江南之泗州人洪公諱世講字石胎湖廣
之黃梅人是役也會稽王君懋經營督課實有力焉
故因以爲之記康
熙二年癸卯仲秋

鐘樓在東城上萬厯閒楊于陞遷建後廢 國朝康熙

閒王懋移鐘於鼓樓上

迎恩樓一名永泰樓在西門外洪霖建楊于陞重築臺

基下有溫泉修蓮池今廢

崑山顧炎武昌黎詩云彈丸餘小邑固守作東藩列
郡誰能比雄關賴此存霜槎春砦出風葉夜旗翻欲
問嬰城事聲
吞不敢言

裴家莊堡縣東十八里

蛤泊堡縣西北三十里

靜安堡縣西南五十五里

詳古蹟
柳城下

莫各莊堡縣東南三十里

套里堡縣西南五十五里

石各莊堡縣南六十里

案讀史方輿紀要以上皆民堡
今俱廢惟蛤泊南北東有門

灤州城高二丈九尺厚二丈周四里二百餘步前代廢

興無考唐哀帝天祐四年劉守光暴亂遼阿保機攻

陷之修築城郭傳厯金元迨明景泰二年鄒來學檄

州同楊雄騫以輓門四東曰禦灤西曰迎恩南曰安

岩北曰靖遠門各有重樓宏治中知州孔經嘉靖間

知州張國維陳士元隆慶中署州事同知賀濤知州
崔炳劉欲仁萬厯閒知州鄭琬白應乾張元慶何士
瑋周宇皆經修葺周宇榜東門樓曰迎暉西曰豐成
南曰朝陽北曰拱辰

池深二丈廣三丈嘉靖閒陳士元濬

國朝乾隆二

十八年州牧王南珍修濬別故護城河

明大學士高穀灤州修城記云灤州去京師五百里
其地舊屬冀州再隸幽州晉唐以來屬遼西及北平
五代阿保機築城以居之州之有城蓋昉於此我朝
混一南北四海爲家州隸永平爲郡文皇帝靖內難
此爲邦畿內地民安物阜熙然太和士習於家農耕
於野地之蕃牧貢賦較夫前代有加奈何承平日久
官怠其職吏隳其事關門無抱擊之虞城郭無捍修
之備因循廢弛匪一朝夕矣戊辰之秋戊狄犯順邊

城老穉驚散室家或不能相保故灤民惴惴焉未嘗
安乎枕席僉都御史鄒公來學閱視灤城土疏址平
非居守之長策乃謀於總戎督都僉事宗勝參將都
指揮僉事胡庸馬榮府守張茂州同知楊雄因舊爲
新高若干丈周若干里疊甃石以固基本扁門鑰以
嚴開閉樓櫓器械無一不具肇功於景泰辛未七月
十有九日畢力於是年之十月一日民暫勞而收久
逸之利物暫費而獲永甯之益誠邊防保障中國喉
襟也功既就宗勝書來乞文請書其事辭曰冀門千
里皆堯封灤州迴接榆關東南臨瀚海北控戎山環
水繞地勢雄形勝不異崤函中前人城此徒勞功遺
基數尺爲高墉年深豈免頽雨風崇者咸垓卑者空
城狐社鼠無所容百年遺事如轉蓬興廢舉墜今古
同燼哉賢達心忡忡旣竭目力膚奏公伐石疊甃鳩
眾工晨夕舉杵聲相春築城言言知幾重視舊不啻
丘與峯圍如鐵甕堅如鋒壁立萬雉難磨礧戍樓遠
望遐邇通絕彼警急清塵烽四民樂業聲颯颯興起
禮讓還租庸輿情但願年歲豐寒則有衣饑有養百
年萬禩

歌時雍

國朝澤州陳廷敬灤州詩云山勢長當面峯巒忽四圍
地經烽火苦路遠塞天微邊馬還東去春鴻故北飛
扶蘇泉下水

曾此映斜暉

滇西師範灤州道中詩云霜老平林綠盡凋國門
西望路迢遙馬前亦有堪圖處細雨寒煙寡婦橋

譙樓在州治大門上萬厯閒知州張元慶建

大觀樓在州治後門萬厯閒知州張堯輔建

馬城堡州東南二十里

卽馬城
廢縣

倂城堡州西南六十里

詳古
蹟門

石佛莊堡州西四十里

榛子鎮堡州西九十里

金史天輔六年置灤州永安軍
節度使領縣四鎮二其一爲榛

子鎮獨吉義傳云世宗次榛子嶺聞海陵沒於軍中
謂義曰信如卿所料卽今榛子鎮案讀史方輿紀要

榛子嶺州西九十里近豐潤縣境金大定初世宗烏祿白遼歸趣燕京次海濱縣尋至榛子嶺卽此今爲民堡又李家莊在州南四十里又南十里曰柏家莊一名風瀄屯又南四十里曰獨莫城城南有大田泊皆有土城舊址又州西百二十里有桃李城亦曰長春社州西南百二十里爲唐山城亦曰橋頭社志云元立屯田總管府於馬城縣諸城皆屯兵所居今因爲村社佛莊堡在州西四十里又州西南八十里有司家莊皆民堡也今俱廢

明州人高輔辰重修榛子鎮公署記云北平之西一百一十里至榛子鎮堡係薊遼孔道舊有公廨備寇蓋使者行臺自經兵燹鞠爲瓦礫四壁僅存甃售民居數楹爲星輅停驂之所而行址淺隘庖漏弗備庭中僅容旋馬一遇卻薛重臣銜命乘傳留犁徑路之旅駒駉駿騎動以千百噉計勢須芻秣於市衢不足壯皇華四牡之行色也太守常公以醫閭異材麟符竹郡行部鎮城思維卜繕舊基建署庠舍斂塞墉堵以肅門闌計其費匪土不堯匪木弗植匪工弗僇匪粟弗給也謀之周大夫馬公不藉一民不牒一物出

其俸縑規度前後作屋三閒用棲紀綱圍人之地自
兩廂以及臺門鱗次櫛立塗茨維新構居停以避風
雨崇戶垣以代桂板俾使星鸞輓之臨憩郵亭而安
信宿磬控驪驪之役獲居處而謹藩籬非太守大夫
減饌垂橐之經營舊館茂草之區不幾廢爲甌脫哉
儻繼來州綬但愼葺宮墉無忘補飭則今日太守大
夫締造之勞嗟予勤其有念哉是不可
以不紀歲月也竟珥管而勒諸石云

國朝知府顧學潮榛子鎮示劉尉鈞恕詩云到眼青山
認欲眞偏因忙暫得閒身墨池光動疏窗午茶鼎香
浮小屋春夢裏回頭應有岸年來舉步亦
看人一官最是驚心處未辨能聲亦累民

司家莊堡州西南八十里

開平堡州西南九十里明之開平中屯衛也唐石城廢
縣衛原設口北大甬沙嶺洪武中調眞定府永樂元
年移置於此其地原有土城成化二年閩巡撫焦總

兵委永平通判段璣易以輒爲東西南三門各有樓
今城圯遺蹟尙存紳商歲修其城樓焉

明尙書姚夔開平中屯衛新城碑記云永平禹貢冀
州之域秦漢爲右北平郡唐爲平州元置平灤路我
太宗文皇帝入正大統遷都北京而永平去京師五
百里遂爲畿甸重地又以灤負山帶河尤爲要害乃
於義豐舊縣置開平屯中衛自大甯沙嶺徙來今去
州九十里舊有土城頽圯成化改元之明年都察院
右都御史李公以其地密邇邊境宜有城以備非常
奏準下有司講修築之政於是巡撫右僉都御史閻
公鎮守印綬監右監丞龔公總兵官東甯伯焦公相
與協謀經畫而府衛咸聽約束擇廉潔官得永平府
通判段璣忠義中衛副千戶陳和董領厥事計貨食
之出入量工程之多寡因舊增新百堵旣完乃作南
門以正面勢作東西門以通往來浚溝隍布橋梁疏
水道是故甲兵有宿室家有護晨昏警嚴鐘鼓分明
民居帖安誠可謂一勞永逸者也周計尺九千二百
七十有八高爲尺二十有三始事於成化三年十月

一日訖工於明年五月十二日通判以是役鉅而不
費重而不勞上衛乎國下庇乎民巡撫鎮守總戎之
功不可無記述以示後乃次其顛末來請余文余惟
城郭溝池有國者所當設也然設必有時我國家承
平百年於茲四方無患而城郭溝池惟恐其不完固
者誠安不忘危之意也况京東保障之地乎雖然民
非兵無以衛兵非民無以守城具矣而守之非其人
與無城同人得矣而治之非其人與無人同故曰地
利不如人和長斯衛者何思有以和其人而
善所守哉庸書此俾刻之城隅以告諸執事

國朝滇西師範問平道中詩云稊籬低護老農家十里
西風酒旆斜秋水夕陽山數點石橋疏柳路三叉黃
登歲晚千倉粟綠長霜前一架瓜最

是授衣人事蚤牽裘扱衽采棉花

又冒雨抵開平詩云瘦馬隨饑僕迢迢古北平歧途
迴積水寒雨入秋城地僻炊煙少年荒酒味更客懷
正無賴愁
見雁南橫

樂亭縣城高二丈八尺五寸厚一丈五尺周三里凡九

百九十七丈門四東曰寅賓南曰鎮海西曰望宸北
曰控遠東西俱南向南北俱東向各懸鐵棧有月城
四門樓俱兩層三閒角樓俱兩層一閒敵臺十堞一
千三百六十土城之創建年代莫考明成化元年巡
撫閩本檄知縣元宏發以輒十七年知縣李瀚增修
宏治十二年知縣田登設堞正德中縣丞孫鴻嘉靖
中知縣侯庶相文祥隆慶中知縣李邦佐萬厯中知
縣于永清 國朝康熙中知縣金星瑞相繼修迄今
已厯多年屢被水衝圯壞已甚

池周城廣三丈五尺深一丈四尺池外有隄石橋四當

四門水關二一自鎮海門西出一自控遠門東出以洩城中積潦明萬曆十九年知縣潘敦復重濬久淤國朝乾隆十六年知縣陳金駿濬水關二道仍由故道出

案樂城自前邑侯陳公詳請修葺未準後日就傾圯迄今南北東三面輒石罕有存者而土峯錯峙望之參差如鋸齒惟西面舊牆猶存十之一二僅有敗堞十餘然亦不可保矣咸豐十年庚申海口戒嚴遂有掘壕築圍之事邑人李潤霖壕工記略曰咸豐己未夏夷船至大沽海口爲我軍所擊船四散間有駛至昌樂二境者先至臭水溝泊五日次至清河口均以三板小舟上岸蓋河口水淺不任輪船故也時余帶勇隨同營弁往視夷四人士岸索供給營弁喬某應對有方毫無畏怯夷見其勢難詐索立岸上兩時許遂上船颺帆去庚申春正月僧親王爲海防事宜同恆制軍及清河通永二觀察親歷沿海州縣相度地

勢籌置團防因昌樂二縣近海諭令城外掘壕令急
如火二月朔制軍由昌赴山海關二觀察會同署縣
任刺史出示曉諭無論紳富商民出資出力工竣時
奏請獎勵城鄉人等罔敢不遵竭蹶趨公不數日
捐款甚鉅爰選日興工兼招邑紳數人立支應局與
督委各員弁在事在局協同監視余亦濫廁其閒於
是鳩僱民夫日集數百人或千餘人不等各備饘
藁裡自東關增福廟東起工牌示口寬三丈底寬一
丈深一丈土積壕裏築牆高五尺底厚八尺頂寬一
尺沿排垛口迤北由北關外掘至西城下去城根三
四五七丈不等迤南由南關外至陳莊接至起工之
處立四門樹柵欄嗣僧邸專派督辦昌樂壕工團練
候補道李於東南北三柵欄內各築礮臺一座兩閱
月而工告竣惟我樂城西北兩面原灤河故道城在
沙灘中南東兩面亦沙土參半非如大沽水鹵土堅
者可比是年六七月雨集所築牆卽淋塌數處厯冬
及辛酉春風起沙旋填淤過半閒有穿牆而過者矣
余身親其事而懼事之久而無徵也爰掇其大略而
記之

明編修余有丁重修樂亭縣城碑記云樂亭縣永平之下邑也本古盧龍地唐開元中割爲馬城縣在五代時契丹并入灤州金又置縣始定今名焉大明有天下因縣而城之當是時瘡痍甫定天子旣重用民力而海內方銷鋒銳興禮樂北烽不然斬關走壙之盜蔑如也范土爲城稍示關闌出入之計成化壬寅縣令李君瀚者始更甃焉繼令田君登建樓櫓設雉堞漸次除備隱隱有禦暴之險矣自茲以來民且狃於燕安憚有所更作雖時時補塞不足勝其復隍之漸屬今丁卯秋邊圉有警城弗自保御史少泉郝公曰是非賢宰莫能安之矣計其部下惟陳留李君可而李君時爲獻縣乃由獻縣徙樂亭令君乃哀其衆力虞其材植經其賦役筮日興事不幾何而墉崇於雲隍濬於川告已事矣邑大夫廷尉西塘王公謂史余氏曰若李侯者豈不誠吾民保障哉方邊警時樂亭去烽火尚遠人乃相顧自危誰不欲挽強挺銳爲天子樹奇勳而顧平日不習於干戈之事旣又誰不欲馮高據險收保清野擊敵人之僞歸而顧險不足恃慮先爲敵所得於是求速化之術悔桑土之晚矣僅僅賊去輒又偷安暇日無有昔日激昂慷慨之氣